



# Jahresbericht 2012



Ds Jahr 2012 gehört scho wieder der Vergangeheit a, es isch es Jahr gsy wo für ds Trachtehörli so wie ou für d Tanzgruppe keiner bsunderi Höhepunkt het gha.

Ds Trachtehörli isch unter der Leitig vom Hanny Burri 49 mau zämme cho, dadervo sy 7 Ufritte gsy. U Tanzgruppe isch unger der Leitig vom Vreni Wiedmer u der Brigitta Grünig 40 mau zämme cho u sy, si 5 mau öffentlich ufträtte.

Ou ds 2012 het mitem Tanzleiterträfä agfange. Am 6. Jänner sy ds Vreni u Brigitta ga nöii Tänz lehre.

Für ds Trachtehörli het ds Jahr am 11. Jänner mitere Singprob agfange.

D Tanzgruppe isch am 23. Jänner mit ihrer erschte Tanzüebig i ds 2012 gstartet.

Am Fritig der 27. Jänner het üsi ordentlichi Houptversammlig im Restaurant Chrüz z Gurzele statt gfunde. Náb de Traktandierte Gschäft, hei mir unter anderem mit grossem Applous d Christine Reinhard, Monika Schober u d Liliana Rothacher dörfe i d Trachtegruppe ufnäh.

Leider het d Agnes Zenger ihre Rücktritt uf d HV 2013 aus Kassierin bekannt gäh.

Wäge diverse Zwüscheffäll vom Wirt wo nid chöi toleriert wärde hei mir es anders Versammligslokal müesse sueche u hei das hie im kirchliche Begänigniszäntrum ou gfunde.

Äs ganzes guets Wuchenänd hei mir am 28. ufe 29. Jänner im Gwatt dörfe verbringe.

Dert hei mir Tanzfroue das Jahr zerscht mau ou übernachtet. U so hei mir eis so richtig Zyt für änanng gha. Hei tou zämme brichtet us natürlech ou luschtig zämme gah.

Am Samstag isch ä grichische Abe ufem Programm gstange. D Liliana het sogar mit de griechische Gescht tanzet u das het natürlech viu zliche gäh. U zum Abschluss vom Abe het natürlech ä guete Drink ou nit dörfe fähle so dass mir du nachhär ganz guet hei chönne schlafe! Am nächste Morge hei mir du ume vouer Elan tanzet u gsunge so dass mir wieder sehr viu hei chönne lehre. A das Wuchenänd tüe mir üs immer wieder mit viu Fröid zrugg erinnere.

Am 11. Horner het ds Tramelan d Veteraneehrig vom BKJV statt gfunde usem Trachtehörli wär dert ds Vreni Gasser geehrt worde, wills grad früsch het gschneit gha u der Wäg nach Tramelan isch wit gsy, het ds Vreni uf d Teilnahm a däm Alass verzichtet.

A der Delegierteversammlig vom Sunntig der 12. Horner ds Tramelan wo die übliche Gschäft vom BKJV sy abghandelt worde ha ig u der Reto Bieri teilgnoh. Unter anderem het der Presidänt vom BKJV der Jürg Domke si Rücktritt uf die nächschti Delegierteversammlig vom 2013 bekannt gäh.

Am Suuntig der 26. Horner het die ganzi Trachtegruppe im Pflege u Autersheim z Wattenwil für Unterhautig gsorget. Es isch es schöns Gfühel weme de betagte u aute Lüt mit üsne Darbietige cha e Fröid mache.

Nach es paarne Jahre Unterbruch hei mir für d Blaskapelle Jantar am Samschtig der 3. März wieder dörfe d Feschwirtschaft führe, mir sy vo der Bsuecherzahl ganz überrascht worde, sy üs doch scho fröh d Pommies-frites u ds Bier usgange u mir hei müesse Nachschueb bsorge. Es het e schöne Zuestupf für y üsi Vereinskasse gäh.

D Vereinsdelegierteversammlig wo am 5. März im Restaurant Chrüz statt gfunde het isch vo der Marianne Reust u mir bsuecht worde.

Nach letschts Jahr sy mir scho zum zwöite Mau am Donnschtig der 8. März i ds Playoff Gwatt ga Bowling spiele, wie scho im letschte Jahr hei gloub aui wo sy derbi gsy der Plousch gha.

A der Delegierteversammlung vom EJv wo am 10. März z Niedergösge statt gfunde het, het d Anna Rosa teilgnoh.

O i diesem Jahr hei während drüene Mau äs paari vor Tanzgruppe am „Tanze Mitenang“ teilgnoh. Dä Alass isch vor Tanzleitig Mittuland dūregfuehrt worde.

Am 16. März sy d Kathrin u Silvia nach Detlingen a d'DV vor Trachtevereinigung Landesteil Mittelland, für di nöischte Informatione ds vernäh. Dert hei sie mit unger angerm vernoh, dass der Jahresbeitrag vo Fr. 3.- uf Fr. 6.- erhöht wird. Wie überau, het ou Trachtevereinigung chli mitem Gäud ds kämpfe. Dūregfuehrt het dä Alass d Trachtegruppe Frieswil.

Am Mäntig der 19. März hei der Walter Fahrni der Reto Bieri und ig d Delegierteversammlung vo der Gürbetaler-Jodlervereinigung z Wattenwil bsuecht.

Aus nöie Presidänt isch der Samuel Trachsel u aus nöis Vorstandsmitglied der Hans-Jürg Kappeler vo de Bärgründe Burgstein gwählt worde.

Nach der Delelegierteversammlung isch üs vom JK Wattenwill es feins ds Znüni offereiert worde.

A wahre Asturm a Bsuecher hets am Sunntig der 25. März gäh den het üses scho traditionelle Trachtezmorge statt gfunde. Für Unterhautig het d Annarös Mathys mit de Blatthenheid-Örgeler u ds Trachtechörli mit es paarne Lieder gsorget.

Am 30. März het d Trachtegruppe Zimmerwald zum Regionauträge yglade. Ou i däm Jahr isch wieder viu gsunge u tanzet worde.

Für einisch het Silvia ä kurze Wäg gha für ads Bott, de das Jahr isches z Schwarzenburg ir Pösche dūregfuehrt worde. Si het doch du gmeint sy chönni ds Fuess gha, leider hets du a däm Tag so fescht gschnet, dass ou sy het müesse ds Outo näh. Mit ihre hei no fuf angeri Gurzeler Tanzfroue teilgnoh. Di Versammlung vom 22. April isch so lang gange, dassme am Schluss du gar nüm Zyt het gha für no eis ds tanze. Drum hei mir üs du entschlosse ds Kaffi bir Silvia znäh.

Am Amtsmusigtag vor MGG wo am Wuchändi vom 4.- 6. Mai stattgfunde het, hei mir vor Trachtegruppe während drei Tag ds Raclettezält gfuehrt.

Zum 50-jährige Jubiläum vom festliche Tanzabe der Bärner Trachtevereinigung hei sich am 19. Mai gut 450 tanzfreudigi Trachtelüt im Casino z Bärn troffe. Uf dr Tanzfläche isch ifrig ds Tanzbei gschwunge worde. Begleitet het üs da derzue d Ländlerkapäue Ulmizberg. Bis kurz nach de eine isch dert ganz viu tanzet worde.

Zumene Häuferabe sy aui Hälferinne u Hälfer vom Amtsmusiktag am Samschtig der 9. Juni vor MGG yglade worde.

Ds Bärnischkantonale Jodlerfest het vom 15.-17. Juni z Schwarzeburg statt gfunde ds Trchtechörli het nid teilgnoh. Es paar Chörlimitglieder hei aus Hälferinne u Häufer mitgulfte.

Aus Abschluss vor de Summerferie isch am Samschtig der 23. Juni ds Brättele i der Kühweid ufem Programm gstande. Es isch e fröhliche u gsellige Abe gsy.

Vom 24. Juni bis am 7. Ougschte hei mir vor Trachtegruppe Ferie gmacht Tanzgruppe het scho am 5. Ougschte wieder mit de Tanzprobe agfange fürs Chörli isches am 7. Ougschte ou wieder mit üebe los gange.

Zum 50. Geburtstag vor Daniela Hadorn isch ou ds Trachtechörli yglade gsy. Mitemne Gschänk u es paarne Lieder hei mir am Suuntig der 12. Ougschte mit Ihre zämme dörfe dä Geburtstag fiire. Ig möchte a der Stell der Daniela no mau ganz Herzlich für d Yladig danke, es isch e schöne u idrückliche Tag gsy.

Am Suuntig der 9. September het z Oberbalm ds Gürbetaler Jodlerträge statt gfunde ds Trachtechörli isch mit de Lieder „Mach z`beschte drus“

(Ueli Zahnd) u mitem Lied „E schöne Tag“ (Josef Dubach) ufträtte.

A heiteri Schar vo Trachtegruppelüt het sich am Wuchändi vom 22./23. Septämber zur Vereinsreis bim Schuelhuus z Gurzele troffe. Üses Reiseziel isch d Alp Babenthal u ds Gebiet Klettgau Zürcher Oberland gsy. Bi rägerischem Wätter sy mir am Samschtig mitem Car uf der Outobahn richtig Brugg nach Würenlingen AG gfare wo mir der Gafihaut gmacht hei. Im Restaurant Frohsinn sy mir scho erwartet worde. Nach däm mir zum Abschied no gsunge hei isch üsi Reis via Waldshut i ds Klettgau witer gange. Leider hei mir nache paar Minute Fahrt wieder müesse umchere will sich mi Gäudsäcku säubständig gmacht het u i dä im Resturant verlore ha, zum Glück het dä über vom Personal gfunde u het sofort telefoniert, das wär no guet use cho so zwee Tag ohni Gäld im Sack.

Nach däm für mi pinliche Vorfau sie mir üsem nächschte Ziel der Alp Babental am Randen zuegfahre, wo mir im Alpgasthuus der Mittagshaut gmacht hei. Will ds Wätter no nid isch besser gsy us immer no gränet het sy die wo ds Mittagsbicknick im Rucksack hei mitgnoh ou y ds Restaurant cho ässe. I gloube es het ds letscht für aui öbis ds Mittag gäh. Nach dämm mir vorem Restaurant gsunge hei, het mi der Wirt no agragt ob mir mau würdi anere Äplerchilbi mitmache leider isch haut der Wäg derthäre wiit u mi müesst fasch zwee Tag gah.

Vor Alp Babental isch üsi Reis y ds Hallauerwygebiet zur Winzerstube bi „Keller`s Rastplatz“ witer gange dert sy mir zur Degustation vo de Hallauerwy mit Burebrot empfangen worde. Mir hei het dert vieu Intressants übere Wyabu u übere Wy säuber dörfe vernäh. Anschliessend hei mir mit zwöine Pfertefuehrwärk e Kutschefahrt dür d Räbbärge gmacht ou hie hei mir vieu Sache über d Räbbärge chöne lehre. Ufem einte Wage isch trotz dämm nasse u chaute Wätter veiechli e gueti u heiteri Stimmig ufcho hets doch unter de Bänk ir Chüeboxe Wy gha wome het chöne konsumiere.

Üsi Reis isch ab Hallau Richtig Zürcher Oberland wyter gange, will sich der Carchaufeur im Vorfäld gloub nid so guet uf d Strecki het vorbereitet gha sy mir trotz einige Verfahrige u Umwäge ca 1 Stund später aus vorgseh doch guet u wohlbehalte im Hotel Hasenstrick a cho.

Doch leider sy d Negativpunkt im Hotel grad wytergange, sy mir doch statt vor Hotälleitig nume vom Personal empfangen worde. U Zimmer verteilig hets sich aus kompliziert use gestellt zum Glück ha y du das säuber i d Finger gnoh süsch hätte die letschte ersch am nächschte Morge es Zimmer übercho. Ou der Service u ds Nachtässe isch nume befriedigend gsy. Hei sy üs ines Hinderzimmer verfrachtet wo mir für üs alleini si gsy. Trotz auem hei mir e gmüetliche u schöne Abe gha, mit Lieder u Muusig isch Zyt wie im Flug vergang mir hei ou dörfe Erläbe was für luschtegi Lieder d Barbara cha. Leider hei mir scho vieu ds Fröh müesse gaschlafe, sy hei üs im Hotel nume wölle ds drinke gäh u heinis Bärndütsch gseit usegheit.

Der Sunntig üse zwöit Reisetag het mitemne Zmorgeässe agfange wo ou nid so befriedigend isch gsy, wenigstent isch ds Wätter besser gsy u d Sunne het sich zeigt. Ou am zwöite Tag het me niemer vor Hotelleitig gseh. Ig ha das gar nid Gästefründlich gfunde u würd das Hotel niemer wyter empfähle. Nachem Morgeässe sy mir zure Rundfahrt dürs Zürcher Oberland nach Rapperswil gstartet. Nachmene Bummu dür die aute Gasse isch üsi Reis mitem Schiff übere Zürichsee wyter gange, ufem Schiff wo für üs isch reserviert gsy, het üses Passivmitglied der Hans Jud mitemene Appero scho uf üs gwartet. Är het natürlich d Gägende ume Zürichsee beschtens kennt u het üs chöne erkläre a was für Ortschafte mir verby fahre ü wases süsch no speziells über die diverse Dörfer ds verzelle git.

Nach der Akunft mitem Schiff z Zürich bim Bürkliplatz hei mir em Hans Jud zum Abschied no es paar Lieder gsunge, will üse Carchaufeur über d Apfahrtszyte nid isch im Bild gsy, sy mir 1 Stund früecher aus ufem Programm gschtande isch z Zürich abgfahre.

U scho isches wieder los gange mit Verfahre u Umwäge, will sich der Chauffeur wieder mau verfare het u nid die richtigi Usfahrt ab der Outobahn gnoh het isch üsi Reis nid ganz nach der Route vom Programm wytergange. Nachere vieu ds länge Carfahrt u einige Umwäge sy mir glich no ds rächte Zyt zum Zvieri-Znachthaut im Gasthof Bäre z Sumiswald aho. Nach däm aui öbis gässe oder trunke hei isches Hei zue gange. U es isch trotz nid grad immer beschtem Wätter e gmüetliche Reis ds Änd gange. Leider isch nid aues Perfekt gsy u so glüffe wies hätt söue.

Am Erndedankgottesdienst vom Suuntig der 14. Oktober het ds Trachtehörli i der Chilche de Lieder „Mach z`beschte drus“ „E schöne Tag“ „Heizue“ u „Üse Vatter“ (Gebet) gsunge.

Am Samschtigabe der 27. Oktober hei d Beatrix Fahrni und ig am Jubiläumskonzärt vor Musiggsellschaft als Ehregescht dörfe teilnäh, wir sy natürlich nid mit lääre Hände gange u hei es originells Gschänk mitgnoh.

Z'Tanzleiterträffe z Gümmligen isch das Jahr am 28. Oktober düregführt worde. A däm Träffe erfahre Tanzlüt immer wases für nöii Tänz git. Aber ou auti Tänz wärde ufgrüschet. A der Houptprob vo üsne Unterhautigsabende wo am Donnchtig der 22. Novämber het statt gfunde isches scho einigermasse guet gange u mir hei zueversichtlich chöne de Unterhautigsabende entgäge luege.

D Unterhutigsabende wo am Samschtig 24. Novämber u Donnchtig 29. Novämber u Samschtig der 1. Dezämber statt gfunde hei, sy sehr guet Bsuecht gsy isch doch der Dorfsaal a aune drüne Datum bis ufe letscht Platz gfüllt gsy. Üses abwächsligsriiche Programm isch bi de Bsuechrinne u Bsuecher guet a cho. Bsunders erwähne möchte ig Theatergruppe wo unger der Leitig vor Daniela Hadorn ds Lustspiel „Spääti Naachwee“ ufgführet het, so wie ou ds Quartett Höstettli wo mit Ihrne Lieder ou geng a bericherig vom Programm sy. U natürlich hei ou aui Mitglieder vor Trachtegruppe zum guete glinge ihre Bytrag gleischtet. E bsunderi Ehr isches für mi gsy üser Dirigäntin em Hanny Burri für ds 10 Jährige Dirigäntejubiläum ds danke u ihre es speziells Gschänk ds überreiche.

A dere Stell möchte ig aune ganz härzlich füreYsatz danke. Danke möchte ig ou aune Nichtmitglieder wo zum guete Glinge bytreit hei u mir immer wieder fürs Häufe dörfe afirage, de ohni die geits nid.

Für d Auterswiehnachte vom Mittwoch 12. Dezämber hei mir üs mau öbis anders usdänt u hei uf Darbietige vo de Schüehler verzichtet. Aus Ersatz sy drei jungi Froue cho Querflöte spiele u hei ou die gmeinsame Lieder O du fröhliche u Stille Nacht begleitet. Der Herr Pfarrer Fabretti het e längerer Wiehnachtsgschicht vorgläse. Leider het ds nöie Programm nid bi aune Lüt Aklang gfunde. Ds scho traditionelle Pastettli zum Nachtässe u ds Chlouseseckli hei natürlich ou das Jahr nid dörfe fähle. Nachem Nachtässe het ds Chörli u Tanzgruppe no es paar Lieder u Tänz vortreit.

Bi Küenzi`s i der Hofmatt het am Samschtig der 29. Dezämber der Autjahrshöck statt gfunde. Mir sy mitmene feine Nachtässe umne richhautige Dessertbuffet verwöhnt worde. Dank üsne Musikkante wo a settig Aläss immer ihri Örgeli mitnäh u üs mit Ihrne Mussigstücke erfreue, aber ou mit üsne Lieder isches e gmüetliche Abe u e schöne Abschluss vom Vereinsjahr gsy.. Adere Stell möchte ig einisch aune Musikantinne u Musikannte Danke, das sy immer wieder für so schöni Unterhautig Sorge. Mercie vieu mau.

Im verflossene Jahr isch ou es Ziel erricht word wo mir scho vorlängerer Zyt mau im Vorstand drüber gred hei. Üsi Homepage isch äntlich Realität worde, u i danke u dir sit gloub ou mire Meinig das die sehr guet isch usecho u sich darf la gseh.

Mir Tanzfroue wete dir Vreni u dir Brigitta ganz, ganz härzlech Merci säge für di enormi Gedud wo dir geng für üs ufbringet. Mir fröie üs geng wieder ufe Mäntig für i ds Tanze törfe ds cho. Mir sy stouz so kompetänti Tanzleiterinne dörfe ds ha. Merci öich zwöine ganz härzlech!

Zum Abschluss vom Vereinsjahr blibt mir nume no, Öich allne für ds mitmache u ds Mit-häufe ds danke.

Merci säge möcht ig der Dirigäntin Hanny Burri sowie der Tanzleitere Vreni Wiedmer u der Vicetanzleiter Brigitta Grünenig für ihr i sehr Wichtige u Kompetänti Arbeit, wo si ds ganze Jahr düre gäng leichte.

Äbefalls Danke möcht ig der Lieder- u Theaterkommission sowie de Rächngsrevisore.

Ä bsundrige Dank möcht ig a miner Vorstandsmitglieder richte. Sie hei mi aus Presidänt immer tatkräftig ungerstützt.

Für ds nöie Jahr wünsche ig öich u öine Familie gueti Gsundheit u mängi schöni u ds friedeni Stunde mit dr Trachtegruppe.

Gurzele im Jänner 2013

Öie Presidänt

*Hj. Schneider*

Hans-Jörg Schneider

